

MIKEL GOÑI ASPEKO AURRELARIA

«Udak beldurra ematen dit, festen tentazioa beti hor dagoelako»

Azkena jokaturako hiru partidua jarraian eta bikain irabazi ditu. Logroñon egiten ari den «lan gogorra» fruituak ematen ari dela dio, eta lehen ez zeukan zerbait duela orain: «Ilusioa». Iragana ahaztu eta datorkionari aurrez aurre begiratu nahian ari da.

Enekoitz Telleria | TOLOSA

Txalo artean doa Mikel Goñi aldagetara. Tolosako Beotibarren beste erakustaldi bat eman du. Aldagietan sartzera doala, Enrike Galarzarekin egin du topo —jaialdiko aurreneko partidua jokatu du hark—, irribarre egin eta esan dio: «Hau duk gozamenal».

■ **Zure «gozamen» hori kantxan ari gara nabaritzen, eta gozatzen gu ere horregatik.**

Azken bolada honetan oso gustura ari naiz. Azken hiru-lau partidua onak egin ditut, eta egia da gozatzen ari naizela kantxan.

■ **Zorionak partidu horiengatik, eta zorionak egoerari buelta ematen ari zarelako.**

Bazen garaia. Horretarako ari gara lanean, hori da gure nahia, ea pixkanaka lortzen dugun.

■ **Zer da, garaizegi oraindik zorionak ematen hasteko?**

Ez, ez. Ni pixkanaka-pixkanaka ari naiz, baina orain uda dator eta... Beno, noizbehinka parranda egitea ere ez da txarra.

■ **Bereziki kezkatzen zaitu udak ala?**

Beldur pixka bat ematen dit, festak daudelako nonahi, beti tentazioa alegia. Han eta hemen jaietan daude, batean eta beste an gonbidatzen zaituzte, zaila izaten da ezetz esatea. Hori da nire beldur bakarra.

■ **Izan ere, ez da erraza askotan zure lekuan jartzea. Alegia, zenbaiterano ez zaion jendeari gehiago gustatzen Mikel Goñi gaiztoa, Mikel Goñi zintzoa baino.**

Hori da funtsean nire dilema handiena, non ote dagoen koska edo noraino.

■ **Lana egin eta uzta jaso. Hori omen da, ordea, oraingo zure filosofia.**

Bai, bide horretatik gabiltza. Orain arte, lana gogor egin dugu, eta emaitzak ere hasi dira iristen. Ni neure buruarekin lasaiago nago, eta hori nabaritzen dut frontoian.

■ **Logroñon bizi zara, eta Joaquín Plazak estu hartu zaitu. Zergatik Plazak bai, eta orain arteko guztiek ez?**

Ez dakit. Berak hartu ninduenan, lur jota nengoen. Nire une

GARI GARAIALDE



JOAQUÍN PLAZA

«Berak hartu ninduenan, lur jota nengoen. Nire une larri guztietan nirekin egon da. Horregatik lortu du, ziurrenik, beste inork lortu ez duena»

PILOTAZALEAK

«Jende horri eskertu egin behar zaio bere portaera. Nik haiei esker jaten dut, eta haiek frontoira etorriko ez balira, nik ez nuke jango»

larri guztietan nirekin egon da, nire aldamenean, eta horregatik lortu du, ziurrenik, beste inork lortu ez duena. Orain bide onetik ari naiz.

■ **Zer utzi duzu atzean bide on horretan sartu aurretik?**

Gauza asko, baina nahiago dut ez esan. Horiek guztiak nire buruan gelditzea nahi nuke.

■ **Zer gauza berrirekin ari zara topo egiten orain?**

Emaitzekin, batik bat, eta jendearen jarrera on horrekin. Berrir bueltatzen ari dira frontoietara. Gauza horiek aurrera egiten jarraitzeko indarra ematen dute.

■ **Izan ere, benetan une latzak bizi izan zenituen.**

Oso une txarrak izan ziren. Pilota uzteketan egon nintzen, baina orain neure burua oso ongi ikusten dut, eta orain ilusioa daukat.

■ **Norbaitek kale egin dizu?**

Jende askok, bai, jende askok. Horregatik, hau guztia esperimentatzen hartu behar dut.

■ **Gogorra izango da, frontoiaz kanpoko zure jarrera horren ondorioz, frontoian bertan zure lagunek zurekin jokatu nahi ez izatea.**

Pilotari batentzat gerta litekeen gauzarik gogorrenetako bat da hori, baina normala da, era berean. Izan ere, zuk frontoian ez baduzu behar bezala errenditzen, zurekin jokatzen ari denak segituan pentsatzen du: 'Hi, ni ez nauk hire zaintzailea'. Normala da, bakoitzak bere burua zaintzen jakin behar du hemen.

■ **Eta zu zeure burua zaintzen, eta jendea berriro frontoia betetzen, nahiz eta askok etsita atzera egin zuten eta aspertu egin ziren zutaz.**

Jende horri eskertu egin behar zaio bere portaera. Nik haiei esker jaten dut, eta haiek frontoira etorriko ez balira, nik ez nuke jango. Pilotan egun handi asko eman nahi dizkiet.

■ **Ari zara, baina hobetu beharra omen daukazu.**

Bai, oraindik ez nago bete-betean. Guztia eman beharrean nago, uda honetan partidu asko izango ditut ziurrenik, eta lau t'erdiko txapelketa ere ongi prestatu nahi nuke. Bada garaia txapelen bat lortzeko.

■ **Eta zure ingurukoak, etxe-koak batik bat, hobeto.**

Beste giro bat dago orain etxean. Aste barruan beti deitzen diet, eta asteburuan ia beti bazkaltzera joaten naiz etxera.

■ **Igandean jokatuko da Manomanistako finala. Zein da zure hautagaia?**

Finalak partidu bakarrera jokatzen dira, eta edozer gauza gerta liteke. Eugik bere aurreneko partiduan ez zuen asko jokatu, baina esaten dute entrenamenduetan eta oso ongi dabilela. Eugi ongi bada-bil, berak irabaziko du.

TXOKOAN

ESKU-HUSKA

Beloki eta Eugi ongi ari dira entrenatzen

Herenegun aritu zen Ruben Beloki, eta atzo bertan Patxi Eugi. Aurtengo Eskuz Banakako Txapelketako bi finalista gogor eta ongi ari dira entrenatzen ekainaren 3rako finalerako, Donostiako Atano III.ean. Beloki bihar bueltatuko da Gipuzkoako hiriburura, Ezkarain (Errioxa), Asegarce-Alti-Maeskuko pilotariak egiten ari diren kontzentrazioa amaitutakoan. Patxi Eugi txapelduna, aldiz, atzo aritu zen Oscar Lasarekin entrenatzen. Bi orduko saio gogorra egin zuen.

Julian Retegi bikain ari da osatzen

Iruñeko Labrit pilotalekuan bi orduko saio egin zuen Julian Retegik herenegun. Iñaki Esain eta Oscar Lasarekin entrenatu zen, Iñigo Simon medikuari horretarako baimena eskatu ostean. Ez zuen bere burua askorik behartu, baina ongi aritu zen. Lau t'erdiko txapelketan parte hartzea ez du baztertu Eratsungoak, oraingoz, eta sanferminetan Iruñean ariko dela ziurtzat ematen da.

Nafarroako lau t'erdiko txapelketa aurkeztuko dute gaur, Iruñean

Iruñeko Fuerte del Principe gazteen egoitzan aurkeztuko dute, gaur (11:00), aurtengo Nafarroako lau t'erdiko txapelketa. Bi adarretan banatuta jokatuko da, finala arte. Asegarce-Alti-Maesku ariko dira batean, eta Aspe beste an. Lehen adarra etzi abiatuko dute Carlos Armendarizek eta Asier Olaizolak, Lizarran —Tele 5ek emango du, Asegarcek eta Maeskuk lortu dutelako irudi eskubideen gainean akordioa—. Beste xehetasunak, gaur.

JAIALDIAK

ATZOKO EMAITZAK
CARMELO BALDA.

Zabalza-Ziskar 20; Sanchez-Agirre 30. Insausti-Fernando 40; Urkia-Beldarrain 39. Egiguren anaia 24; Berraondo-Aranburu 30.

BIHARKO PARTIDUAK
GALARRETA. 16:00.

Martinez-Etxeberria II.a / Larrea-Zestau. Ezkurra-Txikuri / Zeberio II.a-Lizaso. Altuna I.a-Aizpuru / Iñigo-Eizagirre. Zeberio I.a-Zubeldia / Bitoria-Etxebe III.a.

DEPORTIVO. 17:00.

Sanchez-Ziskar I.a / Urkijo-Fernando. Daniel-Rekalde / Ziskar II.a-Garrido. Unda I.a-Garma II.a / Iruñeko-Beldarrain.